



Tir Yimyim

www.tiryimyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimyim@gmail.com

TAPAK 7

Yangia anidakangma :

f Tir Yimyim

Instagram tiryimyim@aolima

YouTube tir yimyim

TAPAK 3

King Charles III nem chuba korang semtsüogo

Karnataka state nung Congress sorkar arutsü: Sharad Pawar



VOL. XX NO. 205 (ADOK 205) DIMAPUR TENTONÜ (MONDAY) MONUPII (MAY) 08, 2023 ₹ 5.00

Manipur nungi Naga nung 600 dak tema anir shilangogo



Nagaland sorkar aser Assam Rifles tem lungjemer Deobarnü Manipur nungi Naga nung 600 dak tema anir shilangogo. (Kohima, May 07, 2023)

Kohima, Monupii/May 07 (TYO): Nagaland sorkari Assam Rifles den lungjemer lendong timtem ajurua aliba Manipur nungi Naga nung 650 dak tema Deobarnü anir adokogo aser ano asünga anir adoktsü.

Nagaland Medical Students' Association, RIMS Imphal züngsemtem Kohima tonger ashiba agi, Manipur nungi anir adoker rongnung tanurtem den kinunger Imphal valley nung mapa inyaka alirtem, RIMS Imphal nung azünger aser specialist practitioners 162, Central Agriculture University nung azünger kaketshir 40, Food & Technology College nung azünger nisung tenet, Manipur University nungi nisung 19 aser Sports Academy nungi nisung pongu lir.

Parnok ya Nagaland State

Transport indang bus 13 aser Police indang bus pezü nung Assam Rifles aser Nagaland Armed Police Indian Reserve Battalions nungi platoon anati meina "Operation Kohima Calling" nungja agütsür anir adok, kong team commander Deputy IGAR (N) Brig Ved Beniwal den Sub-Divisional Police Officer North, Sheta Lohe aser Sub-Divisional Officer (C) Weku Zhiemi nungertem liasü.

Deobar nikongdang 2:00 ako meta Kohima atongba sülen parnok 1st Assam Rifles camp nung agizük aser pei-pe district temi yoka liasü.

"May 3 nü lendong atalok tenzükba sülen onok kanga shisabulua liasü aser iba sülen internet services ajak shibang... onok kidangi meyipa shilangnü, saka komasür shiba den

jembitsü, onoki memeteti akum, saka tangbo onok temolung süngzük," ta RIMS Imphal nung senior resident, Vephizo Keyho-i ashi.

Tensa kanga mejungi liasü, saka paramilitary forces temi shilem agiba sülen tensa tajungba kumogo, ta pai ashi.

RIMS nung azünger kaketshir ka tebo Dr Kedozeto Punyu-i ashiba agi, Imphal nung rongrongshirong adoka nisung tepsetba, ki o jen raksatsüba aser nisung aika yiruba osang angashia tsürabor ama tanurtem aser kidangi maruteti anendaka alirtem asoshi onok kanga shisabulua liasü.

Ajisüaka state sorkari security forces den yaritepa nisung aika meyipa anir aruba atema pelar, ta pai ashi.

Tera menuaka sorkari tanurtem aser nisungtem Kohima-

i meyipa anir aruba atema pelar, ta Dr Atha Vizol-ia ashi.

Advisor, New & Renewable Energy and State Disaster Management Authority & MLA, Nyusietho Nyuthe-i osangbener den jembidang, Manipur nung aliba Naga nung 600 dak teka sangshiba agi masü saka yangji tensa majungba tetsübo nung kidangi meyipa shilangner ta helpline number tem ajanga jembiba sülen mera ya agi, ta ashi.

Ano Manipur telunglen, talisa yimdak-yimtsüngtem nung plywood factory amala nung inyakertema anir adoktsü asoshi mera agitsü, ta pai ashi.

Manipur nungi anir adokertem pela agizükba sentong ka nung jembidang Deputy Chief Minister in-charge of Home & Border Affairs, Yanthungo Patton-i Assam Rifles, Nagaland Police,

Angami Public Organisation aser lokti tentet balalai iba maparen nung yaritepa atema pelaba lemsatepa liasü.

Nisung 676 kumzuka anir adokogo aser ano asünga Manipur tesem balala nungi nisung 600 dak tema anir adoktsü, ta pai ashi.

Menur anir adoba atema state sorkar tenüng nung Patton-i tatok meshia liasü.

Nisungtem arsanga masü saka timtem majurui anir adoktsü mechi tera menua liasü, ta IGAR (North) Maj. Gen. Vikas Lakhera-ia ashi.

Assam Rifles temi Manipur nung aliba spaitem den osang agitepa Nagaland nungi oa alirba kaketshir aser civilian tem tamasa lendong maliba tesem nung anidener ang anir adok, ta pai ashi.

DGP Nagaland Rupin Sharma-ia parnok tayimtsü nung anir adoktsü merang, saka Imphal airport kanga mazüngi aliba ajanga iba sentong nung takok mongutet, ta ashi.

Imphal valley nung timtem balala ajangshiaka yangi kinunger aser medemertem den tatalokba tamajung indang melemsatepsüla, kechiaser yangi aliba nüburttem tsüngta tesempatem madokdaksüner aser Nagaland nung iba ama tensa majurudaksüner, ta Sharma-i ayongzük.

Centre-i Manipur ken o jembitsü renema lir: Union Minister Reddy

Hyderabad, Monupii/May 07 (Agencies): Manipur nung tekeraba nung tensa tajungba dangi arutsü asoshi central aser state sorkari nungdakba mera tem agir aser tensa tajungba nung lir, ta Union Minister, Development of North Eastern Region (DoNER), G Kishan Reddy-i Deobarnü ashi.

Manipur nung mangatetep adoka aliba telok balala dang yimjung nung alitsü mepishia jembidang, ken o angateteptsü asoshi jembishinü akatsü central sorkar renema lir, ta pai ashi.

Nüburttem ajungtsü asoshi centre kodanga temolung meranga malir, aser aluyimer temi mangatetep aliba Farm Laws asem agientsü akhangba ama centre-i inyak, ta pai ashi.

Manipur tesem kar nung Deobarnü nungi curfew agiener aser army indang drones aser helicopter tem yoka tang tensa tajungba dangi arur.

"Yimya tajung nung ken o

angkateteptsü asoshi imlibilema arung. India sorkar renema lir. Nenoki aluyimer otsü meteta lir. Yimjung nung alidang onoki parnok nem angateteptsü merang. Tangatetep kati marutet nung onoki parnoki akhangba ama inyak aser Bill asemji agien. Anungji India sorkar temolung meranga mali," ta Reddy-i ashi.

Sorkar asoshi tongtipangtiba teinyaktsüji nüburttem ajungtsü asoshi lir, anungji Manipur nung alirtemi aji angateta jebishinütsü arutsüla, ta pai nenshia ashi.

Azüdokshi nung asü-amar aser takoksa ajurua alirtem anepalutsü centre aser state sorkari molunga lir, ta pai ashi.

"Parnok tebilemstü kar lira, aji bentettsü state aser central sorkar mapa lir. Asenok ajaki taremzüktep alitsüla. Azüdokshi ajanga masü saka jembishinü ajanga ken o bentettsüla. Azüdokshi ajanga kecha makoker," ta Union Minister Reddy-isa ashi.

Manipur CS inyaktsü Vineet Joshi shimogo

Imphal, Monupii/May 07 (Agencies): Indian Administrative Service (IAS) officer Vineet Joshi ya Manipur indang chief secretary inyaktsü shimogo.

Manipur indang chief secretary inyaktsü Vineet Joshi shimba ya Appointment Committee of the Cabinet (ACC) ajanga Deobarnü agizüka liasü.

Joshi ya central deputation nung liasü aser department of

higher education, Ministry of education nung additional secretary inyaka liasü.

"Manipur sorkari parent cadre dangi anir arutsü asüngdangba ama Appointments Committee of the Cabinet (ACC) ajanga Vineet Joshi meyiba anir arutsü melaogo," ta ACC sangdong ka ajanga ashi.

Vineet Joshi ya Manipur cadre indang 1992-batch IAS officer lir. Pai Dr Rahesh Kumar melentsü.

Mao Union Senapati ajanga Naga nung nem chiyongtsü agütsü

Dimapur, Monupii/May 07 (TYO): Manipur nung tensa majungba ajanga Imphal nungi Deobarnü anir adokba Naga nung nem Senapati nung Mao Union Senapati ajanga chiyongtsü agüja liasü.

Nagaland sorkari anepalua yokba bus timba sür gari 30 jungnüa nung nisung 600 dak tema mener sepaitemi meina adoka liasü. Tensa majungba

asir nüburttem, talisa kaketshir aser tanurtemi timtem ajangshiba angateta Mao Union Senapati ajanga tetsür aser lanurtem densema nisung 200 shi Senapati nung anepdang 6:00 ako meta adenshia parnok nem chiyongtsü anepalua liasü.

Rev K Losu, Executive Secretary, MBC lenisüba kübok Manipur Baptist Convention Centre Imphal

ajanga parnok chiyongdaksütsü achayang asü, saka security inyakyim mechi yamaji magütsütet.

Tadubi aser Mao gate tsüngta 'Marty memorial' nung Mao Students Union (MSU) aser Mao Naga Women's Welfare Association (MNWWA) volunteer temi Naga nungertem agizüka chiyongtsü talep agüja liasü.

Manipur nung President's Rule dang nungdak: K. Therie

Dimapur, Monupii/May 07 (TYO): Manipur nung tensa tajungba dangi anir arutsü asoshi President's Rule dang nungdak. Senti takum 54 samaba, 150 dak tema yiruba aser aika samar aliba aser sen crore aika jenjang ki o jen raksar aliba dang tamajungba tensa mali. Yimtsüng 26 rongtsü, dokan aser ki o jen raksatsü aser auya, nisung aika tesem balala nung prokshidaksü aser aika ozüng agi memelai pua lir. Küm noklang aika kibong ka ama tesendaktep tajung nung liyonga aruba raksaogo, ta Nagaland nung Congress lenir K. Therie ajanga sangdong ka nung ashi.

Tekülem ki raksatsüba talisa Northeast nungbo khenyongi mapet. Asenok küm noklang

aika kati ka indang tamangba yimsü, sobaliba aser yimsü-yimbong akumtsüboa pelatepa liyonga aru. Zübu kanga tulu aser taneptsü angutsü küm noklang junga agitsü, ta ashi.

Center-i shilem agiba pela agizük. Saka mapa tamajung inyaker dang kecha mashi yutsür tensa tajungba dangi arutsü meimlatsüla. Tensa mejungi akumba atema Manipur Chief Minister N. Biren Singh-i lenir ka ama tenüng agitsüla. Pai nüburttem dang langzütettsüla. Pai dangar tenüng asentsü menüngdak, kechiaser pai memeteti dangari kecha meinyaktet. Pa lenisüba kübok kumzuka lir ta nüburttemi temolung melemteter, ta Therie-

i ashi.

Central sorkar asoshi teinyaktsü ajak agi tekeratiba nung rongrongshirong adokdaksür aputsüla aser President's Rule benoka tensa azüoktsüla, aji asünung dang nüburttemi tamang akatsü, ta ashi.

Asenok ya kodanga mepilatettsü ta angateta Northeast nung aliba kin tilatem lir. Asenok kiyimba ajanga tesendaktep lir aser asenok joko kin temeja balala masü. Asenok kidanger lir aser teti kidanger süa alitsü. Asü-amaba ajanga ni temolung shiranger. Asen tarutsü asoshi parnoki bendanga agütsüogo, ta Therie-isa ashi.

Delhi nung Moatsu benjung amung



Dimapur, Monupii/May 7 (TYO): Aoer sobaliba aser inyakyimtem wazüka ayutsü nükjidong nung Delhi Ao Senso Telongjem (DAST)-i ayongzüka May 6 nü Vasundra Vatika Lawns, Delhi Cantonment nung Delhi nung aliba Aoer-tem Moatsu benjung ayongzüka mungogo. Taoba küm ama masü takümbo iba benjung ya tetsü

tebou mapang yimtsüngtem nung inyakyimtem dak ajemdaker mungogo. Benjung ayongzüka agiba nükjidongji lanurtem nem sobaliba i n y a k y i m t e m angazükdaktsüsü asoshi liasü. Sentong nung Aoer tanur tain ajak den anükapangtem aser tejangrartemi shilem agia liasü. Banjung ya tetsü tebou

mapang mi apudetba yimya sayua tenzük aser iba sülen sobaliba ken aser tsüingsang balala saya-a liasü. Sentong nung Kishangarh nungi Aoer lanurtemi sobaliba tsüingsang ka saya, Ao Nagaland Armed Police, Delhi-i sobaliba ken ka aten, Delhi nung aliba Aoer temi sobaliba ken aser tsüingsang saya aser Ao Naga Choir-i ken tajung ka tena liasü.

Sobaliba sentong balala den telok balala tsüngda volleyball league asayatem asaya liasü. Sentong nung lokti pela agizükba o jembiba mapang DAST tir-i benjung amungba nükjidong lemsatepa liasü. Sentong ya benjung chiyong chiyongtepba sülen tembanga liasü, ta DAST Imsenchuba Pongen-i sangdong ka ajanga metetdaksü.

FAC nung career guidance sentong ka ayongzüka agi

Dimapur, Minupii/May 7 (TYO): Fazl Ali College, Career Guidance Cell-i ayongzüka May 6 nü Career Guidance sentong ka agiogo. Iba sentong nung Dr Yesan Sellan Assistant Professor of Library and Information Science, Bishop Heber College, Tamil Nadu, shisalen sayur liasü. Dr. Yesan Sellan-i kaketshisatsü tali bushilokyonga aotsü koda tongtibang aser mapa angutsüsa skill balala angazüktsü

koda tongtibang iba indang lemsatep. Paise, library and information science dak sendakba nung hands- on- training course tem dak ajemdaker tangazükba agüja liasü. Iba sentong nung tetsür kaketshir 187 aser tebur kaketshir 122 den tesayur aser non-teaching staff temi shilem agia liasü. Iba sentong ya Beti Bachao Beti Padhao Scheme, Mokokchung, Nagaland-i sponsor süa agia liasü.

Salt Christian College nung debate tetoktepba agi



Dimapur, Monupii/May 7 (TYO): Department of Economics SSC lenisüba nung agi aser tetendangertem ya Tiatiala, Department of Economics SSC aser P.K. Deb, Department of Economics SSC na liasü. Best debator naroküm ya Karyongdang Jamir-i (motion) aser Niuka Wotsa (against the motion) na nem agüja liasü.

Iba sentong ya Thungdemo Y Patton, Asst professor,

Entrepreneurship & Skill Development training tembangogo

Dimapur, Monupii/May 7 (TYO): Entrepreneurship & Skill Development Training shibangba sentong DGC nung May 6 nü agiogo. Nagaland Tool Room and Training Centre (NTTC), Dimapur den longjemer Skill Development Committee, Dimapur Government College (DGC)-i ayongzüka Entrepreneurship and Skill Development Training sentong ka agiogo. Iba training shibangba sentong ya May 6 nü 12:00 ako nungi tenzuka Seminar Hall, DGC nung agia liasü. Iba sentong nung DGC Principal aser Vice- Principal, NTTC nungi ketdangsürtem, Kudatech Skill Centre nung training agütsürtem, DGC faculty aser kaketshirtemi shilem agia liasü. Iba sentong ya BA 6th Sem nungi trainee student Lichom M Ezung lenisüba nung agia liasü. Sentong nung Course Co-

ordinator, Dr. G. Phukato Sema, Asst. Professor, DGC-i training indang osang agütsü. Course ya mezüngbuba February 13 nungi 23 tashi batch ka nem agütsü aser tanabuba batch nem March 30 nungi April 15 tashi training agütsü. Training nung kaketshir 145-i shilem agia liasü. Course ya (i) Asst. Electrician (ii) Fiber Extraction & Handicrafts, (iii) Post Harvest Management of Fruits & Vegetables aser (iv) Solid Waste Management dak sendakba nung agüja liasü. Kasa mapang nung Asst. General Manager, NTTC Epibeni Ezung-i, college dang kanga pelaba lemsatepba den tarutsü nunga National Skill Development Corporation (NSDC), New Delhi kübok college Skill Hub den longjemer inyaksü imlaba lemsatepa liasü. Laisa, NTTC nung course balala agütsüba indang lemsatepa liasü. Kudatech Skill

Centre nungi Course Director P.A. Thomas-i, takok tajung anguba kaketshirtem nem tenüingsang agütsü aser parnok ajungshia liasü. Maneni Principal, DGC Prof. Sanjay Sharma-i, Kudatech Skill Centre aser NTTC dang kanga pelaba lemsatep. Paise, kaketshirtem nem tenüingsang agüja liasü. Trainer, Post Harvest Management Eranpeni Yanthan-i, la tajangshibatem lemsatep aser kaketshirtem dang skill balala süoki ia angazüktsü ajungshi. Sentong nunga DGC kaketshir, Eshen (BA 6th Semester), Nokmao Konyak (BA 6th Semester), H. Linotoli Swu (BA 4th Semester) aser Limugha P. Zhimo (BA 4th Semester) nungeria training nung tajangshibatem indang lemsatepa liasü. Iba sentong ya Yingai Konyak-i (BA 6th Sem) tepela anküp o jembir tembanga liasü.

Face of Nagaland Season 5buba agiogo



Dimapur, Monupii/May 7 (TYO): Nova Stellam-i ayongzüka FACE OF NAGALAND - SEASON-5 tetoktepba May 7 nü ROYALOK, Dimapur nung agiogo. Iba sentong nung temaba jenjang nung tembangba tetokteper 14-i parnok sempettem sayua liasü. Iba tetoktepba nung tetendangertemji Khekashe Achumi, Naina Daria aser

Naina Jain nunger liasü. Tetokteperitemi shilem kanga junga agiba ajanga terprangertem aser tetendangertem ajak pua liasü. Iba sentong ya Nova Stellam Managing Director & Operations Head Mughato Swu lenisüba nung agia liasü. Tetendangertem-i, tetokteperitem sempet tajung nunga kanga pelaba lemsatep aser Nagaland nungi sempet

tajung aketba lanurtem nem parnok sempet saya-a tangar nem parnok metetdaksütsü asoshi sabang ka agütsütetba atema nemadanga bilemba lemsatepa liasü. Shilem tajung agiba dak alia tetokteper aser züngsemtem nem CrystalBee Salon, Dimapur-i beauty coupon vouchers agüja liasü. Iba tetoktepba final June ita agütsü.

Pei nübertem alidak jenjang balala nung lenirtem den metettepa aser jungtepa alitsü nükjidong nung Ao Kaketshir Telongjem Guwahati nung lenirtemi April 26, 2023 anogo nung Assam nung Director General of Police (DGP), Wb.Gyanendra Pratap Singh, IPS pa office nung ajurua külemi yaritepa aotsü asoshi shisalemsatepa liasü. Iba mapang AKTG lenirtem Assam DGP den külemi agiba noksa ka yangi angur. AKTG ya 1946 küm Januray 13 nü tenzük aser 2021 küm küm 75 abensaba jubileemung mongogo.

Assam nung tanur merenshiba mechi doctor ana pua lir

Guwahati, Monupii/May 07 (Agencies): Tanur merenshiba mechi police temi Honibar aonung Assam nung psychiatrist tejangja, Dr Sangeeta Dutta apuba sülen Guwahati nung nüburtem molungjang nung anisüngzük monguteti lir. Tanur ka merenshi ta tai tonglokja alisang doctor ya Meghalaya nung Ribhoi district kübok Umsning tesem nung ki ka nung atsüka liasü. Ajisüaka police temi la tsüingsü pua ao aser Honibar aonungsa Paltan Bazaar police station bushia anir aru. Iba ken o dak sendakba nung Sangeeta kinungbu Dr Waliul ya anogo pongu atema

police ket nung lir. Ano caretaker Lakshmi Rai, shiba iba ken o nung shilem agia lir, la judicial custody nung lir. Dr Sangeeta den la kinungbu Dr Waliul Islam tenati adopt süa aliba jala merenshia amshi, ta tai tonglokja lir. Apuani doctor ana yagi tanur ka merenshia amshiba ken o nung shilem agia lir ta tanur temeden asoshi nokdaker Miguel Das Queah-i social media nung aitsüba sülen ken o temai adoka liasü. Samaro mapa inyakba mechi doctor ana yagi adopt süa aliba jala ya temerenshi ama anü tatsük nung par ki kilem nung sendaka ayu, ta ashir.

Karnataka state nung Congress sorkar arutsü: Sharad Pawar

New Delhi, May 07 (Agencies): Amongnü Nationalist Congress Party (NCP) Tir, Sharad Pawar-i, Karnataka nung Congress sorkar arutsü, ta metetdaksü.

Mumbai nungi kilometer 350 shi pilar aliba Pandharpur jila nung osangbenertem den jembidang arrshi küm 82 Pawar-i, tang tensa nung state 5-6 nung BJP sorkar lir aser tanünga state ajak nung BJP masüba sorkar lir, ta ashi.

"Ni angashiba osangtsüsang apibo, Karnataka nung Congress sorkar arutsü. Linük ajak sasep nung asadagra asenoki Kerala nungi tenzükdi. Kerala nung BJP lir asü? Tamil Nadu nung lir asü? Ni nenok dang Karnataka indangbo shiogo. Telangana nung BJP ali asü? Andhra Pradesh nung ali asü? Maharashtra nung Eknath Shinde kanga yakyakba ajanga parnoki (BJP) iba state angu," ta Pawar-i ashi.

Karnataka nung assembly election May 10 nü agitsü aser May 13 nü vote azüngtsü.

Pawar-i, Madhya Pradesh nung Kamal Nath Chief Minister asüba mapang nung ozüng alema Congress MLA kar apuba agi Maharashtra nung BJP sorkar aru, ta ashi.

"Rajasthan, Haryana, Delhi, Punjab, Uttarakhand aser Bengal nung BJP mali. Nenoki linük map ajakji reprangdangra state pongu-trok nung ang BJP sorkar lir aser tanünga state tem nungjibo BJP masüba sorkartem lir," ta pai ashi.

Tang tensa nungbo sangküm Lok Sabha election nung shirnoki takok angutsüar pai meshitetsü, ta paisa metetdaksü.

Yaküm küm tomnen Shiv Sena nung Eknath Shinde leniba nung party melung masür MLA 16-i party toktsür BJP den züklokba agi Shiv Sena-i aniba sorkar chirepa liasü.

NCP, Congress aser Shiv Sena teloktep Maha Vikas Aghadi (MVA) aser sangküm Lok Sabha elections dak sendakba nung tasüngdangba ka langzüdang pai, party aseme parnok tsünga menden lemsatsü atema o lemteptsüla, ta ashi.

Opposition telongjem dak sendakba nung tasüngdangba ka langzüdang pai, "Ajaki yamaji süner. Bihar Chief Minister Nitish Kumar-i state kar semdangogo. Onokia iba tebilemba nungji inyakdar," ta metetdaksü.

Ato kilonser Modi-i Bengaluru nung kilometer 8 Road Show agi



Karnataka Assembly elections jakdang May 07, 2023 nü Bengaluru nung Ato kilonser, Narendra Modi-i BJP atema nüboyimja roadshow nung shilem agiba noksa nung angur.

Bengaluru, May 07 (Agencies): Amongnü Bengaluru nung Ato kilonser, Narendra Modi-i kilometer 8 tashi road show nung shilem agiogo.

Pai Karnataka assembly election atema nüboyimba sentong Hombarnü tembangtsü.

Kempegowda kürakyanglu nungi New Thippasandra Road aser Trinity Circle tashi kilometer 8 road show ji ghonda ka ser tesadang agia liasü.

Modi-i Bengaluru tentetsang, Kempegowda kürakyanglu nung naro tokja akhüm agütsüba sülen road

show tenzuka liasü, ta ketdangsertemi metetdaksü.

Gari nungji Ato kilonser den Union Minister of State aser Karnataka nungi Rajya Sabha MP, Rajeev Chandrasekhar aser Bengaluru Central MP, P C Mohan na liasü.

Gari nungjagi Modi-i gari lenmang tip anatsülen alirtem dak teka ayiploksü aser parnok aikati 'Modi, Modi' aser 'Bharat Mata ki Jai' ta yimyim ayima liasü.

Nisungtemi pa dak naro paloktsü aser pai-a parnok dak naro palokja liasü.

Road show tembangba

tesem Trinity Circle nung nisung aika adenshia liasü aser Modi-i teka amteper parnok agizüik.

Karnataka assembly election nung tongti party anaji BJP aser Congress na lir aser election atema nüboyimba mapang piyong party ana tsünga kati ka aitsütepa arudar.

Election Commission of India (ECI)-i national aser state party ajak aser candidates dang election ozüngtem alema meinyaktsü tekümdangtsü metetdakja lir.

Karnataka assembly elections May 10 nü agitsü aser May 13 nü vote azüngtsü.



May 07, 2023 nü Mumbai nung World Laughter Day anogomong amongdang laughter club ka nung züngsemtemi shilem agiba noksa nung angur.

Madhya Pradesh nung tetsür ka ayokba atema nisung pezü puogo

Bhopal, May 07 (Agencies): Madhya Pradesh kübok Raisen district nung nisung ka dang arrshi küm 17 tetsür ka sen 50,000 agi ayokba atema police-i tebur asem den tetsür ka densema puogo, ta police ketdangser kati metetdaksü.

Tetsürlaji Mandla district nungi lir. Japalpur nung mapa inyakba mapang nung lai tai tonglokja alir ana- Pahalwati Bai aser Sunil Kushwaha na ajurua liasü, ta Additional Superintendent of Police, Amrit Meena-i metetdaksü.

Tebur ana jagi la dang Mumbai nung la nem mapa tajung agütsütsü ta shia la mesüzüka liasü, ta Amrit Meena-isa metetdaksü.

Iba sülen parnok Raisen kübok Patai yimyak atongba sülen parnoki tetsürlaji kibong kümdaktsütsü atema nisung ka tenüng agi Vishnu Kushwaha dang sen 50,000 agi ayok.

Iba tatalokba sülen tetsürlar tsüraburtemi Manda nung aliba police station kati oa lar jala samaba ken o benoka liasü.

Nisung shibelena ayokba ken o nung Honibarnü police-i tai tonglokja alir nisung pezü apu.

Deori police station sub-inspector, Shraddha Uikey-i, Mandla police-i metetdaksüba osang nung ajemdaker nisung pezü Patai yimyak apu aser tetsürlaji Mandla police ket nung agütsüogo, ta metetdaksü.

Taruba R-Day parade nung tetsür contingents-i dang shilem agitsü

New Delhi, May 07 (Agencies): Tesüiba küm ishika Republic Day Parade nung 'Nari Shakti' takok ngua sayaba sülen sangkümbo defence ministry-i tetsür contingents nem dang R-Day Parade nung shilem agidaktsütsü.

Sangküm January 26 nü Republic Day parade nung marching aser band contingents den tableaux aser tanga shilem ajakji tetsürtem nem dang agidaktsüner, ta Ministry of Defence-i metetdaksü.

Küm shia parade nung tetsür officers leniba nung contingents-i shilem agiogo saka item contingents ji PBORs (officer rank tekübok) teburtem dang liasü.

Home, housing aser urban affairs den culture ministries nungi secretary tem den chief of defence staff aser Service asem nung tekolakpurtem dangi züluba shidi ka nung Ministry of Defence department of ceremonials-i, taküm Republic Day sülen February 7 nü i defence secretary, Giridhar Aramane leniba nung ketdangsertem den senden amendang taruba R-Day parade nung tetsür nem ang shilem agidaktsütsü lemtetogo, ta metetdaksü.

"Senden nung mapang talangka o lemtepa sülen 2024 küm Kartavya Path nung Republic Day Parade nung contingents (Marching & Band), tableaux aser tanga

shilem ajakji tetsürtemi dang agitsü telemtepa agiogo," ta shidi nungji metetdakja lir.

"Anungji shilem agitsüpur ministries/departments/organizations/agencies ajak dang tang nungi tenzuka iba atemaji renema alitsü mepishia metetdaksür. Mapang shia MoD-i iba dak sendakba osang metetdaksütsü," ta shidi nungji shia lir.

1990 küm nungi tenzuka armed forces nung tetsürtema officers shimmer ajisüaka parnok 3,900 shi dang lir (army nung tetsür 1,710, IAF nung 1,650 aser Navy nung 600). Iba dak alia military medical stream nunga tetsür doctor 1,670, tepo doctor 190 aser nurse 4,750 lir.



May 07, 2023 nü New Delhi nung Patanjali University & Bharat Swabhiman (Women Wing)-i ayongzükba 'Yoga Conclave' nung tetsürtemi shilem agiba noksa nung angur.



TIR YIMYIM YIMOBILEM (EDITORIAL)

DIMAPUR TENTONÜ, MONUPII (MAY) 08, 2023

Ajak litetba chuba yimli

Kodanga anü mair ta jembiba, British yimli nung 40 buba chuba asütsü atema yakanü Anglican tenla ki, koba dang Westminster Abbey ta ajar, iba tenla kidang par tetsü-tebu chuba kin nungi aruba chubatem mezüja shimtetba tesem nung Charles-a kasa sentong agia shimtetogo. Iba Westminster Abbey tenla kidang ya 1066 küm nungi William the Conqueror chuba nungi tenzüker chuba mezüja shimtetba sentong agia aru. Iba tesem nung England chubatem aser nungtugu nisungtem aika rema lir. Atangji, tanü putu nungbo England chuba asüyonga akhi ama yimten yimsüsübaren nung tashi mali saka akhi tetsü tebou nungi aruba par tamaren yimten yimli senmang mesamadaksüi wazüka ayuba yimli ka lir. Aji oda, küm meyerijang junga wazüka aruba chuba yimli nung tanü tashi Laishiba nung ameter nübortem tesünep aser yimjung nung alitsüsa yimsü asütsü nangzükba nungji asenoka tangazüksü aser tagitsü aika keta lir. Tanübo akhi putu ama masü British yimli kübok alir nübortem ya English nungertem dang nungi tangar kintem nungi arua British senso kümer alirtemang teimba aser tamangba yimsü nunga Khristan purtembo UK nütüsung yongsük tesadang ka dang nungi ishinba kümogo. Aji dang masü tesümgangtsü saka asangsang kaji tangbo Britishi prime minister-ji India nungi jakzüsang Hindu nunger Rishi Sunak lir aser British nunger nungtugu yimsüsürtem rongnung Muslim nungertema aika adokogo. Aji oda, Israel lima nungi bener aruba oliv totzü mezüja England chuba shimtetba sentong nung Anglican tenla kidang Hindu nunger yimsüsür kati Laishiba zünga Charles III chuba kümdaktsübaji alima kintem ajak asoshi yimjung aser tesünep osang ka asütsü. Iba osangji India nunga Narendra Modi aser Amit Shah nungertemi anir agizükteta benshitetlasang, Kashmir nungi Manipur tashi nung kin o kin na tsüngda tamangba yimsü agi temeim akümtsü melen tetsükchitepang dener nübortem rongnung takoksa,tesama aser tetsübuttsü lendong agi alima mesüngjemeti akümba ya zep ta anener tesünep yimten mopong tasen ka onla. Charles III chuba akümtsü Lashiba nung ameter nangzük dang, paji shitakba tamanger tajung ka asütsü aser England arogoi British yimli (UK) nung tamangba yimsü tapu balala amangertem ajak tesünep nung sademsadema alitsüsa inyaksü ta nangzükba lima nungji asenoka orr linütsüka bilemer. Iba ama lima kaji asenokia asen lima kümdaktsütsüsa yanglutettsüla. Aji oda, tenla kidang England chuba mezüja shimtetba sentong nung Khristan purtem dang masü saka Budhist,Hindu,Muslim, Sikh aser Yisü dak mamanger Yihuda nunger dena jaoka shilem agidaktsüba jagi tanübo tamangba yimsü kati yimten amokbangtsü merangba putu masüa ta sayur. Atangji, tanü putu ya yimten yimsüsüba menden agi senmang kümer amangtepba akhi chuba yimli mapang to masü saka nübortemi nübortem asoshi inyadaksütsü yimsüsürtem shimba putu lir, anungji UK nunga, talisa, lanurtem rongnungbo aikati joko British yimli nung chuba malitsüla ta akanger. Iba tangatetba nung nokdakertem aikati Charles III chuba akümba anogo nung Charles III ji onok chuba masü ta yimti yimdong nung telok kümer longkak aitba sentong agia liasü. Charles III chuba ya tang arishi küm 74 lir aser mapangi melara pa melen par jabaso tambusang William-i melentsü. Ajisüaka, tanü putu lanurtemi ola adokba ya manentet tuluba kümra, ashiko British yimli nung Charles III ya tesüsabuba chuba asütsüa akok. Kechi komaka temelenshi arudir arung, oshi noklang asem dak tali jembir aliba alima pezü, England, Scotland, Wales aser Northern Ireland agi akümba telongjem lima, United Kingdom (UK) nung tamangba yimsü, oshi aser pei sobaliba wazüka yua benshitettsüsa kati ka akümtsübutepa litetbaji tenükshitsüka lir. Ajiang alima nungbo kotak asütsü. Iba jagi asenokia UK nung linür südi. Atangji, British nübortem madak chuba lir saka chuba mezüja shimnü, parnokia Tsüngrem dang par chuba kümzükang (God save the king !) ta ayimtena shimer.

OLEMSABANG

STATE NGUR KÜM ROKER TAIN POLITICS IBA TASHI ASAYATETER NO...???

- L. Kika Pongener

Nagaland India küpok State ka kümer taküm agi küm roker (60) abensar. Nisung'er arishi küm asünunga küm roker tainji jokorla arishi küm talangbaka ogo ta ashitsü. Küm roker tain arishir nisung kaji kechisarena ajak nung teintet/takotet asütsüla. Iba medemji Politician-tema State ngur küm roker tashi asaya-a arurji joko teintet/takotet asütsüla-a ta nuburtem-ibo imlar. Ajisuaka, kanga tesasatsüka, asen Naga nunger Politician-tembo küm roker tashi asaya-a arur 'Opposition' maliba sorkar ka jenjang tashi dang asayatetba ya angudang nuburtem kanga sungmanger...!!! State ngur mezungbo 'Interiam Body' kati dang yimsusua tenzuk. Iba sülen Election agia Political Party balala melentepa sorkar kümer yimsusua arur. Sorkar Party balala melentepa yimsu sua arudang, küm roker tashi nung tongtetba mapatem rongnung otsüsutsü mapa kaji 'opposition' maliba sorkar yanglutetba ya ka asütsü. Ashiko, opposition maliba sorkar ya linuk aika nungbo maliba mapa ka asütsü sudi. Anungji iba ya alima matsüngdang konang ka masü, saka numamedangi bilemtsüba mapa ka amai nuburtemibo bilemer. Congress (INC)-i yimsu asüba mapang nunga opposition maliba sorkar ka ajanghia aruogo, saka iba mapangjibo tanga Party katia Nomination File masüba agi Congress Party den tetokteper mali opposition malitsüsa aküm. Tesuiba Peoples Democratic Alliance (PDA) sorkar nunga nujiso telemtetba 'Solution' agitsü nungdem nung opposition maliba sorkar ka yangluogo. Ano tang NDPP & BJP teloktep sorkar nunga nujiso 'Solution' nungdem nung opposition maliba sorkar ka akümtsü bangjemtepba osang nguogo. Aji oda, nujiso 'Solution' agitsü nungdem nung opposition maliba sorkar yanglu yongjia, nujiso tatempang telemtetba ka agitsüba mapa kuma inyaktetba tanü tashi nung nuburtem-ibo kecha mangur. Anungji iba ya nubur mesuzuktsü atema küli bushiba mapa ka, mesura pei ajangzuktsü bushiba mapa ka amai nuburtem-ibo bilemer.

Democracy yayim agi yimsu asüba sorkar ka nung 'Opposition Bench'-ji kangasa tongtipang lir. Democracy yayim agi yimsu asüba sorkar ka nung 'Opposition Bench' malibaji tongtipang shilem ka agi mabensa asütsü. Atangji Centre sorkar-a suang, State sorkar-a suang opposition tashi tait ka maliba sorkar kaji alima aser nubur atema takoksa tulu asütsü. Aji oda, sorkar inyakyim tim masüba nung opposition-i tashi-ita nunga ta ola adok-aka, maparen aika nung Rulling sorkar-i parnok mulungba nung odang attsür aor. Opposition liaka yamaji inyakernung, opposition tashi-tait ka melira, sorkar anema ola adoker aser metongshitsür melira, asen lima aser nubur kanga akoksatsü ta nuburtem-ibo kanga sasa-a bilemer. Asen Naga nunger State ngur taküm agi küm roker abensar, anungji küm roker tain State ka nung Politician-tema kanga dang teintet/takotet asütsüla-a ta nuburtem-ibo imlar.

Naga nunger atemabo 'Party Manifesto' & 'Party Ideology' tangatetba-a kecha mali amai, oda Political Party ka nung Primary member & Active member akümbaji party ticket ammer election-i aitsüba atema dang akümba amai dang agir. Tangarbo political party ka nung adenbaji, party manifesto & ideology nung langka tajung chitetba agi dang adener, saka asen Naga nungerbo Electioni aitsü atema Party ticket atema dang adener amai mapa jagi sayur. Ajiser, Election temerbo ano pei onuleni aotsü ta dang angatet ama nuburtem-ibo bilemer. Tang tembangba Election sülena opposition maliba sorkar nung adentsü lemtetba mechi nung, Party kabo Central leader-temi anentsüba (Dissolved) osanga nguogo. Atangji, iba ama Politics asayaba yagi Naga nunger Politician-tem dak nuburtemi tanang mechiteter aser tamang mekateter.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Tsüngremi dang asen lima aneptsütettsü: Joe Biden



May 04, 2023 nü 72buba National Day of Prayer sentong nung Senator James Lankford aser Chaplain, Barry Black nati jembidang tangokba noksa nung angur.

May 07, 2023: May 04, 2023 nü America nung 72buba 'National Day of Prayer' mongogo; iba anogomong sentong nung jembidang US Tir, Joe Biden-i, Tsüngremi dang asen lima aneptsütettsü, ta metetdaksü.

National Day of Prayer ya 1952 küm United States Congress-i tenzüka liasü aser 1981 küm taoba mapang US Tir, Ronald Regan-i iba anogomong ya küm shia May ita mezüngbuba Brihostibar anogo nung amongtsü metetdaksü.

May 4 nü National Day of Prayer anogomong nung America nung arika courthouses, capitol buildings aser tekülem kitem nung adenshir Tsüngrem dang sarasadema liasü.

America nung den jembidang Tir Joe Biden-i, "sarasademsü temedenji asen linük temzüng nung shia lir aser America nung sobaliba nung ibaji lir," ta metetdaksü.

"Sarasadem ajanga tenema aienshitettsü, tamakoktsü-akoktsü, ta asübaji tamang tiyongtsü lir. Asenok longjemerbo tamakoktsütema akoktsü, ta America nungeri amanger," ta pai ashi.

Biden-i, "Sarasadem ajanga tashi agütsür aser asen democracy tashi itdaksür. Alar sobaliba samatsütsü aser vote temeden atema raraba nung sarasademji tera liasü. Meimchir ajak kasa yanglu aser Tsüngrem mesükba nung yanglu, ajak akhümкета züngshitsü aser kasa züngshitsü atema sarasadem ajanga asenok maneni ajungshir," ta pai ashi.

Paisa America nungersensotem dang, nüchiso aser temoatsütem atema pei tamang aser tangatetba yari tenüngsang agütsütsü aser maneni Tsüngrem leniba, taochi aser tekümüzkba meshia sarasademsü ayongzük.

2023 National Day of

Prayer sentong ya Congressman, Robert B. Aderholt leniba nung agi aser iba sentong nungji Rev. Samuel Rodriguez, Dr. Ronnie Floyd, Senator James Lankford (R-OK) nungerdensema nisung aikati jembia liasü.

Senator Lankford-i yamaisarasadema liasü, "Nai dang nisung melungjang melenshitsuetsü. Tsüngrem, onoki tajung inyakba agi malaktsü atema onok yariangma. Onoki sarasademsü aser Na atatsü atema yariang. Yisu tenüng nung Nü yimli atema iba mapang ya amshiang."

Nüngtugu sayutsüngir, Franklin Graham-i social media ajanga, "Linük ka ama asenoki Tsüngrem aser Pa O nungi atsüngzüka ogo aser ibaji ajanga tatalokbatem asenoki tenük agi angur. Rara, ozüng alema inyakba aser soseta asüba tatalokbatem kanga bulur. Khristan ka ama asenoki ano taliba asentenshir sarasademsüla. Laishiba ajanga sarasadem ya tongtibang kümdaktsütsü asenok dang tuyur. Tir nungitenzüka asen lenirtem atema sarasademjang, Congress nung tenzükertem, state aser local level nung lenirtem atema sarasademjang. Tsüngremi parnok nem shisa agüjang, parnok len angiang aser asen linük dang taochi sayuang ta asenoki sarasademdi," ta ayongzük.

Paisa, "Mapang ka nung kübu @BillyGraham-i yamai ashi, 'Sarasadem ya Khristantem atema hadir tajungtiba lir.' Tanü National Day of Prayer anogomong nung aser anogo aben asenoki Tsüngrem bushidi," ta ayongzük.

Dare 2 Share tentetsang, Greg Stier-i, "Tanü ya #NationalDayofPrayer lir. Iba linük nung asentenshi milak atema kü den sarasademang! Asentenshiji kechi? Iba ya

Khrista dak ranglokba, pei sasa pei bushiba aser ibaji ajanga osangtajung lemsateptsü atema ajungshiba lir. Iba linük nung chichiba tanela asentenshi milak jangruba asenoki atangji nung angutsü atema sarasademdi," ta ayongzük.

Harvest Christian Fellowship nung pastor, Greg Laurie-i, "Tanela asentenshi milak asenoki nungdaker. Tsüngrem sentong nungi asenok talangka atsüngzüka ogo, aser ibaji ajanga asenoki tamajung aika ajangshir, ajisiüaka asenoki asen linük atema sarasademba aser asen tamang lemsatepba ajanga iba tensa ya melenshitsu akok," ta metetdaksü.

'The Chosen' ajanga tepuokdak alir meyrjang aika melenshitsu

May 07, 2023: Yisu Khrista taküm otsü nung ajemdaker yangluba "The Chosen" film ajanga maneni alima nung nisung aika taküm nung temelenshi bener arutsüdar; iba series ajanga talisa US tesem balala nung tepuokdak alirtem taküm melenshidaktsütsü nükjidong nung Prison Fellowship Ministry-i inyakdar.

Prison Fellowship ajanga The Chosen series ya jail 300 dak tema nung sayutsü atema inyaker.

"The Chosen" ya tetenzük nung kanga takok anguba film ka lir. The Chosen season shia senotsü aika nungdaker, ajisiüaka nija aser corporates tenla ajanga series tasen yangluba maparen nung timtem kecha majurur. Item series ya oshi noklang aika nung adokogo aser maneni Season 4 sangküm sayatsü sentong lir.

The Chosen series ya Chosen app den Amazon Prime, Netflix aser Peacock nung angati stream asür ajisiüaka jail nungbo streaming

ANOGO ABEN TSÜNGREM DEN

Tzüra Atem

(T.ken 104: 5-13)

Shirnok yimti nung alir parnoki Tsüngremji teyanglur Tsüngrem lir ta ken ken amadoker. Lemangtem cement agi takang yanglur. Yakta Tsüngremer teyangluba takang yanglur lila ta bilemer. Asenoki Tsüngrem teyangluba ken shisadangtsü aser metettsü tenüngdaktsü. "Pai alimaji iba tongshi manung yanglu, angji teti aji marakzütsü asoshi. Nai aji süoshi agi ama molutzü agi nembangtsü; tzütemji temalen noktak. Nai arutsü nung parnok ajen, Ne tsüngmok ola agi parnok yakta jena oadok. Parnoki ajanga maotsü nai arutsü yanglua toktsü; angji tanaben parnoki alima meyipa nembangtsü" (t.5-7,9).

Tzüji temoatsü ka lir. "Pai ayongnutem lenti yoker; tenem rongnung parnok ayimer" (t.10). Ayongtem, ayongnutem aser tenemtemji tobur tajung noksa ka lir, koba nung shirurudem chiyongtsü aser tajemtsü angur. "Moapu shiruru shia nem parnoki tajemtsü agütsür; arem gadotem tzüra atemer" (t.11). Item ayongkümtem nung aliba süngdongtem nung ozütem tesepe yanglur- "Kongsangtem rongnung parnoki ken atener" (koda tobur tajung) (t.12).

Tsüngremi ali nung tzü aiener. Tsünütsü adoker, aser nisung aser shiruru alitsü akoker. Aser talila temoatsü ka ama, ozütemi kongsangtem rongnung ken atener. Teyangluba ajak temulung süa lir.

"Pa temaba takdang nungi Pai tenemtem nung tzü agütsür. Alima ne mapatem süngjang agi sünga lir" (t.13).

Teyanglur Tsüngremji ano tekümtet Tsüngrema lir, aser tanü Pai ne tetsüraba tiptemdaktsütsü.

Ne temang asoshi Tsüngremer temoatsü yimya ajanga ne nem bilemtetdaksür. Pai ano Pa purtem nem tanela nungdak agütsür. Na tanüa nungdak lir asü? Ne tanela Pa temoatsü süngtsütsü Tsüngrem dang asüngdangang.

memelar.

Prison chaplain, Paul Neilsen-i Facebook ajanga, "Jail teimbaka nung internet mali aser streaming memelar, ajisiüaka onoki DVDs nung sayur," ta metetdaksü.

2020 küm coronavirus wara mapang March ita nung Prison Fellowship-i closed-circuit video streaming service "Floodlight" yanglua liasü, aser iba partnership ajanga linük tesem ajaklen jail nung tangbo stream süteter mesüra 'The Chosen' DVD copy angati ngua jail nung sayuteter.

Prison Fellowship ministry-i Facebook nung sangdong ka ajanga, "The Chosen sayutsü atema onoki Come & See Foundation den partnership yangluogo aser ibaji ajanga onok kanga pelar. Yisu Khrista taküm otsü aser Yisu ministry indang The Chosen series ya US nung aliba jail 300 dak tema nung sayutsü," ta metetdaksü.

Prison Fellowship Tir aser CEO, James Ackerman-i, "Taküm melenshidaktsüba television series ya (The

Chosen) alima tesem ajaklen nüngtugu kümogo aser Prison Fellowship Floodlight platform ajanga iba ya jail nung puoka alir tetsür-tebur meyrjang aika danga sayutsü. Come & See Foundation dang pelar," ta metetdaksü.

"Iba ya ajanga tang jail nung puoka alir aika taküm nung telmelenshi adoktsü aser taneptsü ngua Yisu atema tzüratsüji onok sarasadem," ta Ackerman-i lemsatep.

Texas Prison ministry nung inyaker, And Frances-i, "The Chosen" ajanga Texas nung aliba jail nung puoka alir aika melenshidar, ta metetdaksü.

"Jail nung puoka alir tetsürtemi iba ya meimer. Parnoki tasüngdangba balala asüngdang aser Laishiba nung aliba otsü taküm kümdaktsür ta parnoki ashir," ta lai metetdaksü.

Come & See Foundation nung CEO, Stan Jantz-i, "The Chosen' repringdang Yisu ajanga tepuokdak alirtemi teimla aser taneptsü angutsü onoki sarasadem," ta lemsatep.

AO OSHI ANGAZÜKDAK:
TANÜ ANGAZÜKTSÜBA OJANG



Pungshi

(v) telok jena aoba (run away)

* Police aruba ngur auertem ajak **pungshi**.

Pungten

(v) jokten (keep on jumping)

* Tenla kidang nisungtemi **pungtena** ken aten.

OLONG PAITEP # 6508

1		2		3		4	5		
				6					7
		8							
9				10		11			
			12					13	
						14			
16						17			

TIPIEN

- 1. Nisung jenti - (5)
- 4. Tsük rudenba - (5)
- 6. Temzüng tesashi - (5)
- 8. S _ _ _ i - (3)
- 9. Nisung telemsa - (3)
- 10. Anogoshi - (4)
- 12. Ajanga aor - (4)
- 13. Tsük rizüngdak - (3)
- 14. Tebang nungi adokba - (3)
- 16. Süngdong tatembangtiba - (5)
- 17. Meputep - (5)

LANGTSÜNGLEN

- 1. Tenük telong - (9)
- 2. Committee dang ajar - (5)
- 3. Yagi ki okdoker - (7)
- 5. Yim lenmang - (5)
- 7. Temoatsü keter meyipa aruba - (9)
- 11. Kanga junga menemba - (7)
- 12. Majinü - (5)
- 13. Tzüma nung senzüba - (5)

OLONG PAITEP # 6506 TELANGZÜBA

TIPIEN :

- 1. Telok, 4. Aluru, 6. Ozüng, 8. Emk, 9. Kin,
- 10. Teti, 12. Süir, 13. Jen, 14. Ola,
- 16. Talak, 17. Mazük.

LANGTSÜNGLEN :

- 1. Yipten, 3. Nüja, 4. Sangro,
- 5. Milen, 7. Tulu, 10. Laza,
- 11. Aben, 12. Tiyong, 13. Ajizük,
- 14. Aitsü, 15. Tasa, 16. Aina.



ALOKBA O SOBANGBA NA TANGAR KOZÜ DONG NUNG TUA LIA KIBUR ARUR :

- Kibur** : Asangurtem, nena ya kechi inyakerba ya ?
- Alokba** : Oko, küna ya akpok yatarba ati.
- Kibur** : Waa, nenabo kozü dong nügang tua akpok yatar?
- Sobangba** : Oko masüako, idak nungyagiang akpok kongsa aliar penzüteter aja. Ya oko kolen senzürba ya?
- Kibur** : Haeet, kiburi kibur kozü lui aru nung kolen senzür ta asüngdang? Jendanga kozü posta asem denya nenaprong tsürabur anir ozü ki ghonda ana tsüngda bushia marura ni yimtem nem case agütsütsüa, aji angatetang no?
- Alokba** : Okay okay!

-Lilir : WhatsApp

Tanur asoba anogo nung salem osang den noksa angati adokdaksünüra - Tenüng, Küm, School, Talidak & salem osang tejanga zülur, noksa (photograph - any size) ka den anogo 3 mesüra 4 jelia e-mail : tiryimim@gmail.com nung yokang mesüra Tir Yimyim bureau tem nung agüjang.

Tepela Tasoba Anogo



- 1. Tenüng :
- 2. Tasoba anogo:
- 3. Küm : 4. Class :
- 5. School :
- 6. Talidak :
- 7. Salem osang :

Assam: Opposition party 11-i delimitation anema takhangba agütsü

Guwahati, Monupii/May 7 (Agencies): Congress densema Assam nung opposition party 11-i state Chief Electoral Officer (CEO) nem Assembly aser Lok Sabha constituency tem delimitation inyakyim anema tezüluba nung takhangba ka agütsüogo.

Parnoki ashiba agi, ken o balala dak ajemdaker state nung delimitation inyakyim magi atatsü atema lemtetba ya tang tashi mebantet lir.

Tezüluba nung takhangba agütsüba nung 2001 census dak ajemdaker Delimitation Act, 2002 kübok linük nung iba inyakyim benoka inyaksangshi, saka Assam nung iba anema longkak aitba ajanga magi atatsü asoshi telemtetba agia liasü.

Assam nung iba inyakyim magi atatsü atema tir-i 2008 küm February 8 nü tetuyuba agüja liasü.

Electoral constituency aika nung delimitation inyakyim benoka inyaksangshiba ajanga nüburtem aser parnok lenirtem pilatsü, arrtsü melenshitsü aser iba ajanga kin balala tsüngda tebandang adoktsü ta tsüba bilemer.

Takhangba nung NRC inyakyim tembanga minyak tashi iba inyakyim benoka inyaksangshi masütsü mepeshia metetdaksüogo.

Tir-i 2020 küm February 28 nü taoba mapang tetuyuba

agütsür aliba aginja tetuyuba tasen ka agütsü aser iba ajanga delimitation commission ka tentettsü asoshi lenmang lapoktsü, koba opposition party meshidaki tentetogo, ta ashir.

Iba commission tentetba ya ashishia Supreme Court nung ken o benok aser iba sülen Centre-i Assam ya iba term atema 2021 küm agintsü aser Jammu and Kashmir nung dang iba inyakyim benoka liasü, ta takhangba nung shia lir.

Tezüluba nung takhangba agütsüba nung opposition party temi ashiba agi, iba inyakyim anema nokdakba ya taoba mapang tetuyuba agütsüba tang tashi magin lir asüba agi lir.

Iba inyakyim ya 2001 census dak ajemdaker benoka inyaksangshitsü, koba state nung aliba nüburtem ashishiba rongnung tongtibangtiba onük liasü.

National Register of Citizens (NRC) update asüba tang tashi sangdonga mali asünung sorkari delimitation pusema tetuyuba magütsü tsüngda party ajak tebilemdangba angadangtsü nüngdaker.

"Ajisüaka iba amaji minyak aser tang sorkar kümteter aliba sorkari parnok mulungka nungiba inyakyim pusemogo, koba ajanga state nung mepetmesü adoktsü ana nung lir," ta takhangba nung shia lir.

"Iba dak ajemdaker political party 11-i Assam nung

delimitation exercise benoka inyaksangshitsü asoshi benokba anema ola adoker," ta tezüluba nung takhangba agütsüba nung shia lir. Iba takhangba nung Congress, CPI(M), Rajior Dal, Assam Jatiya Parishad, Jatiya Dal Asom, CPI, NCP, CPI (ML), RJD, JD(U) aser TMC lenirtemi signe süa lir.

Election Commission (EC)-i March ita Guwahati semdang aser iba mapang delimitation inyakyim dak sendakba nung parnok tebilemdangba angadangtsü asoshi political party tem densema stakeholder balala den sensaksemogo. Ajisüaka iba senden nung Congress-i shilem magi.

Taoba küm December ita EC-i tetuyuba agütsüba dak ajemdaker state nung delimitation inyakyim ya January 1, 2023 nü tenzükogo.

2022 küm December 1 nü Assam Cabinet-i district pezü parnok jakzüka district tem den longjemdaksütsü asoshi telemtetba agi. Biswanath ya Sonitpur den, Hojai ya Nagaon den, Tamulpur ya Baksa den aser Bajali ya Barpeta den longjemdaksütsü asoshi telemtetba agi.

State nung administrative units tasen metentettsü asoshi EC-i tenokdangba agütsüba benoka inyaksangshitsü anogo ka dang lia district tem longjemdaksütsü asoshi telemtetba agia liasü.

Sonowal-i Sittwe Port nung mezüngbuba Indian cargo ship agizüktsü

Dibrugarh, Monupii/May 7 (Agencies): The Union Minister of Ports, Shipping & Waterways and Ayush, Sarbananda Sonowal-i May 9 nü Sittwe Port nung mezüngbuba Indian cargo ship agizüktsü.

Iba sentong ajanga Syama Prasad Mookerjee Port, Kolkata aser Myanmar kübok Rakhine state nung Sittwe Port na tsüngda khu abenba rongtem senzusenpongtsü atema lenmang lapoktsütsü aser iba ajanga linük ana tsüngda transportation dak sendakba nung putu tasen ka tenzüktsütsü.

Iba lenmang ajanga Bay of Bengal peninsula ajunga atema rongsenketzüng nung maongka tasen lapoktsütsü aser iba ajanga South Asia aser South East Asia na

sendakteptsütsü, ta Sonowal-i osangbenertem den sensaksemba mapang ashi.

Sentong nung o jembiba mapang Union Minister Sarbananda Sonowal-i, "Ato Kilonser Narendra Modi lenisüba nung Northeast India ya India indang terenlok asoshi onük balala benoker aliba nung temaba jenzang nung lir," ta ashi.

"Modi-i Northeast terenlok asoshi rangloker inyakba ajanga Myanmar nung Sittwe port takaratiba nung yangluogo, koba tarutsü nung Northeast India s h i s h i l e m b a b a t s ü t s ü ajungkettsü atema nükjidong yur yangluba lir.

"Northeast India dak alia iba port ajanga Bangladesh, Bhutan aser Nepal asoshia shishilembatsü asoshi lenmang

lapoktsütsü."

"Iba ya Modi indang 'Sabka Saath, Sabka Vikas' philosophy benoka inyaksangshiba tatishitsü lir," ta Sonowal-i ashi.

Sittwe port yangluba ya Kaladan Multimodal Transit Transport Project (KMTTP) nung shilem ka lir.

Iba port inyaksangshi tenzükba sülen Sittwe port ajanga South East Asia den multi modal transit connectivity atema lenmang lapoktsütsü.

Sittwe Port ya India aser Myanmar na tsüngda Kaladan ayong nung Multimodal Transit Transport Facility yanglutsü atema mulungtepba nung shilem ka lir aser iba ajanga Myanmar nung Sittwe port aser Mizoram na sendakteptsü.

Hindu nunger kodanga kiralongrar masü: Assam CM

Bengaluru, Monupii/May 07 (Agencies): Hindu nunger kodanga kiralongrar ama meliasü, ta Assam Chief Minister Himanta Biswa Sarma-ii Deobarnü Mangalore, Karnataka nung osangbener den jembidang ashi.

Election atema Congress party-i right wing outfit Bajrang Dal shibangtsütsü nangzükba

atema telangzüba agüja jembidang Sarma-i iba oren ya süoka liasü.

"Hindu nunger kodanga kiralongrar masü. Parnoki (Congress) Popular Front of India (PFI) aser Bajrang Dal kasa kumdaksünüba ya western media dang Hindu nungera kiralongrartem lir ta shinerba," ta Assam CM Himanta Biswa

Sarma-i ashi.

Kasa mapang, "Rahul Gandhi junga lidaktsütsü mechi tetsü Sonia Gandhi-i küm 20 tashi kisüng rara arur," ta paisa ashi.

BJP-i Muslim tsürtem takum jangratema aser akumtsüboa lidaktsünür, iba yongji onoki uniform civil code mapa kuma amshitsü ajungshir, ta Sarma-isa ashi.

Texas nung shishilempadak nisung ti khaset



Allen, Texas nung nisung ti khasetba sülen police tem iba lendong atalokba tesem nung adenshia aliba noksa nung angur.

Dallas, Monupii/May 07 (Agencies): United States kübok Dallas yimti north tsütsü kanga mazüngi aliba shopping mall ka nung prangbong bena alir kati nisung ti khaset aser tenet yirusü, ta police temi ashi.

Lendong agütsüsang ya pa kisüngi inyak, ta keddangsur temi amanger aser Honibarnü Texas state kübok Dallas jila north tsütsü Allen nung aliba Allen Premium Outlets tezülen injang khaloktsüba sülen police officer kati pa dak akha, ta police temi Deobarnü ashi.

"Pai prangbong ola angashi, prangbong akhaba tesemi ao, temolung melemi alisang den khatep aser khaset. Iba sülen pai ambulance tem aja," ta nisung 100,000 shi aliba Allen jila nung police tekolakba Brian Harvey-i Honibarnü osangener senden ka nung shia liasü.

Online nung prokshiba dashcam video ka nung prangbong bena alisang ya gari

ka nungi alur tetsüng agi jajaba lenmang nung aliba nisungtem dak akha tenzüik. Iba video tangoka aliba gari meyiper aodang injang ter dak tema khadokba ola angashia liasü.

Allen fire department tekolakba Jon Boyd-i ashiba agi, injang agi yirur alir nisung toku tashi mozüki temi par department ajanga anir ao.

Nisung ana mozü kidang asü, ta Boyd-i Honibar aonung osangbener den tanaben jembidang ashi.

Nisung asem kanga sashia yirur lir aser pezü tajungba lir, ta pai ashi.

Dallas-area hospital system, Medical City Healthcare ajanga sangdong ka agütsüba nung parnoki arishi küm pongu nungi 61 tsüngta nisung ti anepalutagi, ta ashi.

Dallas northeast tsütsü mile 25 shi pilar aliba mall nungi nisung noklang dak tema süngjem-süngjema ayazüka

aluba TV nung sayuogo aser aika teka azüklen mekanger liasü aser police temi repranga liasü.

Mall kimalen lenmang tezülen tetsüng agi jajaba tesem nung azü yimshia aliba aser nisung tasü mang sü temesüng agi aleper aliba noksa tema nguogo.

United States nung kodanga majangshiba nisung tepsetba lendong tang kanga bulua ataloka aruba rongnung Allen lendong ya tasenba alitsü. Hopta ka jakdang Cleveland, Texas nung nisung kati kidanger nisung pongu khaseta liasü.

US nung 2023 küm tenzüker tang tashinung iba ama lendong nung nisung 198 takum samaogo.

Developed country ka nung prangbong agi nisung timtiba asüba linükji US ya lir, kong 2021 küm nisung 49,000 aser 2020 küm nisung 45,000 asü.

Ukraine rara: Wagner nem injang agütsütsü nangzük

Moscow, Monupii/May 07 (Agencies): Bakhmut nungi Russia nung Wagner Group sepaitem ainshitsü amokmerener anogo ishika lir parnoki akhangba ama Moscow-i injang tali agütsütsü nangzük, ta iba telok tekolakbai ashi.

Brehostibarnü Yevgeny Prigozhin-i Wagner sepaitem tasü mang aika jakdang nokdaker Russia keddangsur aija jembiba video ka prokshia liasü.

Tasüngji pai Wagner sepaitem May 10 tashinung Bakhmut yutsür aotsü, ta shia liasü.

Saka iba yimti nung maneni raratsü asoshi nüngdaka aliba injang agütsütsü Moscow-i molungogo, ta Prigozhin-i Deobarnü ashi.

Prigozhin temolung melenshiba ya taoksatsü tulubo masü. Pa ya yimjak nung nüngtugu akumtsü meranger nisung ka lir aser pai taoba mapang amokmerenba ama meinyak.

Russian sepaitem aser jurila meyong military company, Wagner nungi sepaitemi ita aika Ukraine nung Bakhmut yimti ya agitsü meranga arur, saka iba tesem ya kangabo tongtipang masü.

Iba yimti nung raradang Russia aser Wagner sepaitem meyirijang aika takum samaogo ta anüolen linüktem keddangsur temi amanger, aser Ukraine anüdoklen iba yimti ya sempet ka ama kumogo.

Russian sepaitem aser Wagner sepaitem külem sür raraka tesendaktep ya kanga ajungbo masü.

Tongpang nung teyari peria magütsür, ta Prigozhin-i mapang shia Russia keddangsur aija arur.

Sangdong tasen ka nung Prigozhin-i ashiba agi, Ukraine nung October aser January ita tsüngta Russian sepaitem anir alisang Gen Sergei Surovikin ya Russia mitkar aser Wagner mercenaries tsüngta jembitsü ka asütsü shimogo.

"Petinu aika aliba sepaitem tanishir aika rongnung pai dang raratsü meteta lir. Danga army general shinga dak temolunglemtsü mali," ta Prigozhin-i ashi.

Prigozhin-i Bakhmut nungi par sepaitem anizüker aotsü nangzükba ama inyaksü mashi saka nüngdaka ama Bakhmut nung inyaksü temelaba agütsüogo, ta shia liasü, anungji parnok yangji alitsü amai ajiteter.

Prigozhin-i tang tesüsa sangdongba nung Kremlin nungi telanzüba agüja mali.

Wagner ya tanishir, nükjidong aser tejangraba balaka lir aser Prigozhin ya yimtenren tsütsü nükjidong lir amai nüburtemi amanger.

Pai ain adoka jembidang aiben Defence Minister Sergei Shoigu aser Chief of the General Staff Valery Gerasimov anema jembir aser Russia Tir Vladimir Putin'er telok nunga mepetmesü adokba osangtem lir.

Brehostibarnü sangdong nung, "Shoigu! Gerasimov! Injang kong lir? Parnok yagi volunteers ama aru aser jenjang aketba office nung nenok melemtsü atema parnok asür," ta shia liasü.

Injang agi anüngba ajanga Wagner sepaitem anogoshi tali-tali asür, ta pai ashi.

Iba mapang Ukraine keddangsur temi Prigozhin ya shidakba Bakhmut nungi par sepaitem anizüker aotsü tebilemba lir südi, ta bilemba liasü.

Russia nung Mongulbarnü Victory Day mamungdang Bakhmut makdoktsü atema Wagner temi par sepaitem iba yimti leni tali yoker, ta Deputy Defence Minister Hanna Maliar-i Hokulbarnü shia liasü.

King Charles III nem chuba korang semtsüogo

London, Monupii/May 07 (Agencies): Küm 70 sülen United Kingdom nung sentong tulutiba ayongzüka agidang King Charles III nem chuba korang semtsüogo, kong chuba'er kinungertem, British aser Commonwealth sepaitem 4,000, alima nung lenir 100 shi aser television nungi million aikati repranga liasü.

Archbishop of Canterbury Justin Welby-i küm 360 tain St Edward's Crown ya Honibarnü Westminster Abbey nung ghonda ana sentong agidang Charles tekolak nung semja liasü.

Charles indang kinungtsü tanabuba, Camilla nema Queen Mary's Crown semokja chubatsür kumogo.

Chubai ochishia yimsü asütsü aser Church of England kumzüka ayutsü nangzük, kong pa tekolakba lir. Iba sülen pa shingai mangudak tesem ka nung iba sentong indang temeshitiba mapa inyaka pa teka, tekolak aser teku nung Jerusalem nungi bener aruba temeshi totzü mezüja liasü.

Temaitsü aliba regalia semloktsüba sülen Welby-i pa kolak nung St Edward's Crown semloktsü aser iba tesem nung adenshia alirtemi



"God save the king" ta ayimtena liasü.

"Tsüngremi King Charles kumzükang. King Charles arishia liang. Chiba teti tatem makai liang," ta abbey nung alirtemi ayimten.

Tower of London aser linük yimtiba tesem ajungalen, linük nung, Gibraltar, Bermuda aser tzüyim nung aliba rong tem nungi gun salutes agüja liasü.

King Charles III-i temangba yimsü balala nungi nüburttem asoshi temoatsü asütsü sarasadem aser UK Ato Kilonser Rishi Sundak-i iba inyakyim ajanga putu tasen

ka tenzüker, ta ashi.

"Danga linük katia yamai meinyaktet. Ibai tereprangtsü nung ajungba kisüng masü. Ibai asen puti otsü, sobaliba aser yimsü-yimbong tejak tenteta sayuba mapang ka lir," ta pai tweet asü.

Charles'er jabaso tambusang arishi küm 40 tain Prince William-i tebu ashi anga pa sülen anidaksü nangzüka tebu matsüngdang apudak.

William tenu Prince Harry-a tebu chuba korang asema sentong nung aden saka pai tongti shilem magi.

Harry ya chubar kibong

nung 'working member' masü. Pai iba shilem 2020 küm yimjak nung toktsü aser chubar kibong atema kaket ka zülua liasü.

Prince Harry kinungtsü Meghan Markle bo California nung tena tanur Lilibet aser Archie den liasü.

Japan indang Crown Prince Akishino aser pa kinungtsü Kiko, Spain indang King Felipe VI aser Queen Letizia nungertem den linük balala nungi tekolak tem iba sentong nung adentsü jaoka liasü.

British chuba nem korang semtsüba sentong nung US nungi kodanga tir dena maru aser Honibarnüa kasaji inyaka liasü, saka First Lady Jill Biden bo iba sentong nung adentsü London-i arua liasü.

Iba sentong nung adenertem rongnung France Tir Emmanuel Macron, German Chancellor Olaf Scholz aser European Commission tir Ursula von der Leyen nungertem liasü.

Russia, Belarus, Myanmar, Afghanistan, Syria, Venezuela aser Iran nungi lenirtem iba sentong nung maden. North Korea aser Nicaragua nungi lenir masü saka senior diplomats ang jaoka liasü.

(Maneni tapak 8 nung...)

Real Madrid-i Copa del Rey kokogo



Monupii/May 7, 2023

(Agencies): Honibarnü Seville nung Copa del Rey final asaya nung Rodrygo-i goal ana idakja Real Madrid pur Osasuna kokogo. Real puri 2014 kum sülen tang mezüngbuba iba asayamung kokogo.

Toni Kroos-i metsüba ball ka tsükdaker pa tsütsülei aruba sülen Brazil nunger asayar yagi goal idakja parnoki asaya akok.

Osasuna pur tang agi tanabenbuba-ang Copa del Rey final nung asaya liasü aser Lucas Torro-i goal ka idakja goal kasasa akümba sülen parnoki Real ket nungi iba takok bener aotsü amokmerena liasü.

Asaya nung Rodrygo-i second 106buba nung mezüngbuba goal idakja liasü, koba Spanish cup final nung kum 17 tsüngda goal takaratiba idaktsüba liasü.

Estadio de La Cartuja nung fan 25,000-i pusema Osasuna pur asaya aser parnoki goal idaktsütsü asoshi maongka nguteta asaya, ajisüaka takok mongutet. Club tenteter kum 103 nung parnok mezüngbuba takok marok angutsü atema meranga asayadar.

Asaya nung mapang apuloktsür asayaba mapang Kike Barja-i par team asoshi tanabuba goal idaktsür lila,

ajisüaka pai metsüba ball Dani Carvajal-i kanga junga nokdanga liasü.

Asaya nung Osasuna puri target (5) nung ball timba shot süa liasü. Real puri iba asaya nung target nung ball asemben dang metsü, saka Carlo Ancelotti-i aniba team yagi goal idaktsütsü asaya akok.

Final asaya kokba sülen Real pur tang agi Copa del Rey 20benbuba kokogo aser parnok joko Mongolbarnü Champions League semi-final mezüngbuba leg nung Manchester City den asayatsü atema rangloker inyaksangshitsü.

Chithravel Sable aser Parul nungeri NR tasen yanglu

Monupii/May 7, 2023

(Agencies): Triple jumper Praveen Chithravel-i national record ajatetba den 2023 World Athletics Championships qualifying standard tongtetogo aser kasa mapang nung Avinash Sable aser Parul Chaudhary nati USA nung track event ka nung tetsür aser tebur 5000m national record tasen yangluogo.

Honibarnü Havana, Cuba nung V Prueba de Confrontacion 2023 tetoktepba nung Chithravel-i meter 17.37 jukteta temaba jenjang nung tembanga liasü. Iba asayamung ya World Athletics category F event ka lir aser pai Renjith Maheswary-i 2016 kum 17.30m jukteta national record yanglur aliba ajtetogo.

Arishi kum 21 tain Chithravel-isa, 2023 Budapest World Athletics Championships

qualifying standard koba 17.20m lir, iba ya ajangetogo. Pai taoba kum National Inter-State Athletics Championships, Chennai nung 17.18m jukteta gold angu, koba pa asoshi tajungtiba liasü.

Pai 17.37m juktetba ya non wind assisted jumps season's top list nung tanabuba lir. Chithravel tang Cuba nung coach Yoandri Betanzos den training agidar.

World junior championships medallist T Selva Prabhu, shiba Chithravel den kilemi training agidar, pai 16.58m jukteta iba asayamung nung pezübuba nung tembang aser U-20 national record tasen ka yangluogo.

Kasa mapang nung Sable aser Chaudhary nati Sound Running Track Festival nung tetsür aser tebur 5000m asemtepba nung national record tasen yangluogo. Iba asayamung

ya World Athletics Continental Tour silver level event ka lir koba Los Angeles nung asaya liasü.

Sable-i taoba mapang alizüng 13:25:65 nung tongteta national record yanglur aliba ajateta iba asayamung nung alizüng 13:19:30 nung tongteta liasü. Iba asayamung nung pa 12buba nung tembanga liasü. Chaudhary-ia, kum 13 tejakdang Preeja Sreedharan-i alizüng 15:15:89 nung tongteta national record yanglur aliba iba asayamung nung alizüng 15:10:35 nung tongteta record tasen ka yangluogo. Iba asayamung nung la jenjang 9buba nung tembanga liasü.

Sable aser Chaudhary naprongla tang USA nung training agidar. Chithravel, Sable aser Chaudhary nunger ajak Inspire Institute of Sport (IIS) asayartem lir.

King Charles III nem...

Iba sentong tenüng nung Deobar nikongdang Windsor Castle nung ayongzüka aliba concert nung Katy Perry, Lionel Richie, Take That aser Andrea Bocelli nungertemi ken atentsü, kong nisung 10,000 shi adentsü imlar.

Nisung ajakibo chuba tasenba aginüa meliasü. Chuba yimli ya democracy atema majung. Parnok ya colonialism tushiba temaitsü ka

lir, ta nisung kati ashi.

Iba sentong agitsü lia sepai meyirijang metsü tashi London aser temeket tesemtemi yoka liasü.

Chuba yimli anemba telok, Republic nungi züngsemtem iba sentong tenzütsü ghonda ishika lia London nung Trafalgar Square anasa "Not My King" longkak aittsü asoshi adenshia liasü.

May 8, Hombarnü ya public

(Tapak 7 nung...)

holiday sangdongogo. Aser chubar kibongi Britain nung alirtem dang iba anogo pei aliba tesem nung voluntary mapa inyaksü ayongzüka lir.

UK nung coronation sentong tesüsaba ya 1953 kum Queen Elizabeth II arishi kum 27 asüba mapang la nem chubatsür korang semja iba sentong agia liasü. 1601 kum sülen May ita chuba korang semtsüba sentong ka dang lir.

Wrestler temi Singh anema jenjang

agitsü asoshi Centre nem anogo 10 agütsü

Monupii/May 7, 2023

(Agencies): Khap panchayat tem aser longkak aita aliba wrestler temi sexual harassment dak sendakba nung Wrestling Federation of India (WFI) tir Brij Bhushan Sharan Singh anema jenjang agitsü asoshi Deobarnü Centre sorkar nem anogo 10 ultimatum ka agütsüogo.

Haryana, Rajasthan, aser western Uttar Pradesh nungi khapa 250 shi nungi lenirtem den aluyimertem noklang aika Jantar Mantar nung wrestler tem pusema adenshi.

"Tanü khap tem wrestler tem aser aluyimba lokti tentettem senden amenba sülen

onoki Singh anema jenjang agitsü atema sorkar nem anogo 10 agütsüogo aser jenjang magira onok ano adenshia longkak tesashiba aittsü," ta Delhi nung Palam khap tir Surendra Solanki-i ashi.

Wrestler temi anir longkak aittsü aser khap aser aluyimba lokti tentettemi teyari agütsütsü, ta pai ashi.

"Anogoshia khap kaka nungi züngsemtemi Jantar Mantar nung yimjung nung mener longkak aita nung shilem agitsü. Longkak aita inyakyimtem ajak wrestler temi telemtetba agitsü aser onok parnok sülen anidaktsü," ta Solanki-i ashi.

AWC: Jeremy Lalrinnunga-i snatch nung silver medal angu



Monupii/May 7, 2023

(Agencies): Asian Championships nung Deobarnü India nunger weightlifter Jeremy Lalrinnunga-i snatch nung silver medal angu ajisüaka overall total mongutet kechiyong pai clean and jerk nung asembenprongla barbell majungkettet.

2022 Commonwealth Games sülen tang mezüngbuba asayamung ka nung shilem agiba mapang iba asaya nung asayar 12 nungi Jeremy kijai overall total monguteti liasü.

Ajisüaka arishi kum 20 tain asayar yagi non-Olympic 67kg weight class nung snatch nungbo 141kg ajungketteta silver medal ngua liasü.

Clean and jerk nung Jeremy-i 165kg anaben tashi ajungkettetsü merang saka tamakok angu, Iba sülen pai kg ana ajungketer 168kg ajungkettetsü merang saka Youth Olympic championship tesüsabuba koker aliba asayar yagi ajia majungkettet.

Pai barbell trokben- snatch nung asem aser clean and jerk nung asem- ajungkettetsü merangba nung anaben dang

takok ngua liasü.

Mizo nunger asayar, shiba tebi yiruba ajanga taoba kum World Championship nung masayatet, pai tetenzük nungi junga masayateti liasü.

Pai snatch nung mezüng 137kg ajungkettetsü merang saka pa indang temekoki metizükseti liasü. Ajisüaka kasa seret ya tanabenbuba ajungkettetsü merangba mapangbo ayonga ajungkettea liasü.

Iba sülen Jeremy-i 141kg ajungketteta iba section nung tanabuba jenjang nung tembanga liasü.

Medal agütsüba sentong nung lifter tem podium nung nokdakba mapang pa kanga tezü adangba reprangtetogo.

Iba asaya nung China nunger asayar He Yueji-i 320kg (147kg+173kg) gold medal angu, local asayar Lee Sangyeon 314kg (139kg+175kg) aser Uzbek nunger lifter Ergashev Adkhamjon 312kg (138kg+174kg) nati silver aser bronze medal ngua liasü.

Honibarnü Bindyarani Devi-i tetsür 55kg event nung silver medal ngua India atema mezüngbuba medal ngua liasü.

BILEMDANGANG

"Shirangtemi tinyaktetsü kecha mali; anema alidang merangang."